

Menyemarakkan penulisan berkaitan kemerdekaan

Oleh SAPORA SIPON



KEMERDEKAAN membawa bersama-sama seribu satu makna kepada setiap individu. Ramai yang melihat kemerdekaan sebagai satu pengakhiran kepada satu babak penjajahan dan penghinaan kepada bangsa.

Namun, ada juga yang mengaitkan erti kemerdekaan sebagai satu peluang untuk bercuti dan berehat.

Kemerdekaan bagi mereka yang sama-sama terlibat dalam memastikan saat yang begitu dinantikan menjadi kenyataan membawa makna yang terlalu besar dan kenangan yang tidak akan dilupakan.

Kemerdekaan bagi mereka adalah satu pengorbanan dan maruah bangsa. Dalam menuntut kemerdekaan negara, seringkali nyawa sanggup dipertaruhkan, keluarga dan harta sanggup ditinggalkan.

Detik-detik penting menuntut kemerdekaan,

erti kemerdekaan, usaha mengekal dan mencemerlangkan makna kemerdekaan sepatut diterjemahkan dalam bentuk penulisan agar ia dapat dihargai dan dihayati oleh setiap individu.

Penulisan berkaitan kemerdekaan boleh disemarakkan melalui pelbagai bentuk seperti mengadakan pertandingan menulis (sama ada dalam bentuk cerpen, novel, penulisan lirik lagu, sajak dan skrip drama radio/televisyen).

Banyak penulisan yang menyentuh mengenai kemerdekaan dihasilkan sama ada di dalam atau di luar negara.

Penulisan ini sama ada wujud dalam bentuk buku, rencana, cerpen, sajak dapat memberi semangat patriotik kepada pembaca.

Buku "50 Tahun Pendakian ke Puncak Emas" terbitan Jabatan Penerangan menyingkap rentetan lengkap dari awal detik kemerdekaan sehingga ke sambutan jubli emas kemerdekaan negara yang ke-50 tahun.

Istimewanya buku ini ialah ia memaparkan tokoh-tokoh perjuangan bangsa. Antara to-

U.M. = 9/11/2007
koh-tokoh perjuang bangsa yang dimuatkan di dalam buku ini ialah Datuk Onn Jaafar, pengasas UMNO, Tun Tan Cheng Lock, pengasas MCA dan V.T Sambathan, bekas pemimpin MIC.

Buku ini juga turut memuatkan empat bekas Perdana Menteri Malaysia yang terdahulu selaku tokoh penting negara yang membentuk Malaysia hari ini hingga ke tahap cemerlang, gemilang dan terbilang.

Kandungan buku ini turut mencakupi peranan Malaysia di arena antarabangsa, ke arah kegemilangan Wawasan 2020, Islam Hadhari dan juga perpaduan negara.

Buku *The Struggle for Malaysian Independence* secara umumnya dihasilkan berdasarkan pengalaman Datuk Seri J.J Raj (Jr.) yang melalui zaman sukar negara dalam usaha mencapai kemerdekaan.

Buku *Potret Seorang Pemimpin* pula menceritakan mengenai perjuangan Tan Sri Fatimah Hashim dalam perjuangan menuntut kemerdekaan.

Bahan-bahan penulisan lain yang menyentuh tajuk kemerdekaan ialah "peristiwa falak dan merdeka", "Kentalnya patriotisme", "Kecekalan pemimpin bawa negara harungi pemodenan", "Rakyat cemerlang negara terbilang", "*The fight for merdeka*", "Islam Hadhari", "Hari Kebangsaan ingatkan rakyat", "lindungi negara" dan "memahami erti kemerdekaan di sisi agama".

Penulisan-penulisan berkaitan kemerdekaan mampu menjadi bahan bacaan berguna kepada individu yang ingin memahami dan menghayati nilai kemerdekaan negara yang dinikmati sekarang selain menyuntik semangat patriotisme terhadap negara.

Kemerdekaan membawa erti yang besar kepada setiap orang. Tahun ini negara menyambut 50 tahun sambutan kemerdekaan.

Lantaran itu, adalah wajar penulisan mengenai kemerdekaan dipergiatkan supaya rakyat dapat memahami dan menghayati nilai kemerdekaan selain menyuntik patriotisme terhadap negara.